



16. juni 2026

UPA2026/54

**Uunga siunnersuut: Utoqqalinersiallit tamarmik toqqissimasumik akilersinnaasamillu angerlarsimaffeqartinnissaat qanoq ililluta qulakkeersinnaaneripput pillugu apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Bo Martinsen, Demokraatit)

Siullermik apeqquteqaat aallaavigalugu oqallinnissamik siunnersuuteqartoq Bo Martinsen, Demokraatit qutsavigiumavarput oqallisissiamut qaqitaanut.

Nunatsinni utoqqanngorluni inooqataaneq nuannersuusariaqarpoq. Utoqqaat illoqarnikkut, inissaqarniarnikkut, sussassareqatigiinnikkut aningaasaqarniarnikkullu atugarissaartut pilersissallugit sulissuteqartuartaqartugut Siumumi isumaqarpugut, taamaattumik utoqqaat ajunngitsunik atugaqarnissaat periarfissaqartitaanissaallu Siumup sulissutigiuarusuppa.

Siullermik oqallissaarisup qulequtsiussimasaa eqqarsaatigalugu, tassalu utoqqalinersiallit tamarmik toqqissisimanartumik akilersinnaasaannillu angerlarsimaffeqartinnissaat qanoq ililluta qulakkeersinnaaneripput, siullertut Siumumi isumaqarpugut inuunermi pingaarnerpaajusoq inuusukkallarnermi namminerisamik angerlarsimaffeqarsinnaanerup qulakkeerneqartarnissaa, taamaaliornikkut suliuunnaarnermi aammalu utoqqalinersiaqalernermi toqqissisimaffigisamik immaqalu aamma akileriikkamik illoqalereersimanissaq qulakkeerneqarluni. Taamaattunik utoqqarpassuaqarmat eqqaamassavarput – taamaattorli aamma assigiinngitsut peqqutaallutik taamatut inissinneq ajortut amerlallutik. Taakkuuppullu uani oqallissaarummi siunnersuuteqartup eqqartorneqartariaqarnerannik isumaqarfigisai.

Qinigaaffik kingulleq eqqarsaatigalugu aamma pisortat inissiaataanik iluarsartuussinissarsuaq pillugu Inatsisartut akuersissutigaat, tassungalu atatillugu Siumumi aamma pingaaruteqartutut angorusutatta ilagaa atuisut akiliteqartarnissaat eqqarsaatigalugu naleqqussaasariaqarneq. Tassalu boligsikringi naleqqussartariaqartoq aammalu nalilernerqartariaqartoq kiassarnermut qaammaqquteqarnermullu aningaasartuutit boligsikringip aaqqissuunneqarneranut ilaatinneqartariaqannginnersut. Taamatut aaqqiissuteqarneq Siumumi qularinngilarput utoqqaat aamma angerlarsimaffeqarnermut atugassaqartitsilissagaluartoq.

Nunarpummi isorartoorujussuuvoq akiliutaasa atukkallu pitsaanagerusumik piffimmiit akikinnerusumillu piffimmut aamma assigiinngissinnaasaqalutik, soorlu ilai issinnerusumiippat kaperlattartumiillutillu, taamaammallu aaqqissuusseqqinnissaq eqqarsaatigalugu tamakkuuppud aamma nalilersorluagassat.

Taamatuttaaq utoqqarpassuaqarpoq inissiani ukiorpassuarni, assersuutigalugu ukiut 40-rut sinnerlugit akittoriartortumik akiliiuarlutik najugaqartut aammalu ilaqarlutik ilaqutariit amerlaarsuunerullutik pisinnaalluarallaramik arlalinnik sinittarfilinni najugaqartut, utoqqalillutilli kisimiileramik amerlavallaanik initalimmi najugaqaramik taperneqarnissamik mattussaaqqasut, taamaammat tamakku tamarmik nalilersorluagassaappud pitsanngorsaavigneqartariaqarlutillu.



Illoqarfinni utoqqalineq oqinnerusutut isikkoqartoq Siumumi isumaqarpugut, tassami nunaqarfinni assersuutigalugu imermik nammineq assartorluni piffiuvoq, orsussamik ullut tamaasa pisiniarnerit pisariaqarput, tamakkualu aamma tamaasa arlaatigut suleriaqqinnermi nalilersuutissanut ilaanissaat Siumumiit isumaqarfigaagut.

Oqallinnissamik siunnersuuteqartup ilaatigut tunngavilersornermini taavaa soorlu ilinniartunut kollegiat assigalugit aqqissuussisoqarsinnaaneranik isumaqartoqarsinnaanersoq, tamanna Siumumi toqqaannartumik isumaqatiginngilarput, taamaattorli utoqqaat pisinnaanerusut eqqarsaatigalugit inissianik pitsaasunik sanaartortarnerit ineriartortittuarnissaat Siumumi soqutigisaraarput, tassuunakkut toqqissisimaneq matussuserneqakutsoorneqarsinnaalluarmat.

Naggataatigut, toqqissisumik angerlarsimaffeqartinneqarsinnaaneq eqqarsaatigalugu Siumumiit oqarusuppugut, utoqqarnut sullissisut aammalu sulisussaqaarniarneq eqqarsaatigalugit sulisinnaanerup pilerinarsarnissaa taangitsoorneqarsinnanngimmat, piffissamimi kingullermi nunatsinni utoqqartatsinnut sullissisut amigaataanerujussuat sammineqallattaavoq, tamassumalu aamma nukittorsaaviginissaa pisariaqarluinnartoq Siumumi isumaqarfigalutigu.

Taamatut Siumumiit oqaaseqarluta oqallissaarummut qujavugut, oqallilluarnissassinillu kissaallusi.

Qujanaq.

Erik Jensen, Siumut